



東華續錄

光緒一百八十一

臣朱壽朋敬編

臣章奎琛恭校

六月癸丑朔以潘萬才爲貴州提督○袁世凱奏臣於光緒二十七年十二月間附奏募練新軍籌撥餉項片內聲明俟訓練數月後卽將應裁各營分別遣撤以所裁之餉移歸新軍支放奉旨著照所請該部知道欽此欽遵在案查直隸准練各軍於光緒二十四年經前督臣裕祿分別裁併酌改營制嗣經臣歸一律計馬步礮隊准軍二十營又歸入淮餉案內支銷武衛前軍三十營七哨水師礮船五十二艘又歸軍三十八營迨二十六年拳匪之亂有添招者有改併者計前督臣李鴻章任內淮練及新招各軍一百二十餘營水師礮船五十號節經陸續裁併自臣蒞任以後實在准軍四十二營九哨一百騎又山西調回武衛前軍六營八棚改爲淮軍先鋒隊水師礮船五十號練軍三十一營一隊其督署衛隊餉局護勇尙不在內值此時艱歟絀自應嚴行整頓汰弱留強以紓餉力但直境自經兵燹伏莽繁多人心浮動亦未可操之太急應酌量緩急依次辦理計自上年以來節次裁併尙存淮軍四十一營八哨二小隊水師礮船四十二號練軍二十四營三哨三小隊內淮軍統按每營裁二哨以三哨爲一營練軍駐防熱河古

北口庫倫等處十營因防務緊要未能裁改外其餘十四營統裁二成計准餉項下原銀一百五十餘萬兩現存五十一營八哨二小隊水師礮船四十二號計每年共需銀一百萬兩連裁節雜支等項約可勻撥銀五十餘萬兩練餉項下歸防練餉支發者現因津郡暨各海口聯軍尚未全退巡緝彈壓關緊重要所有巡練各營祇可分別變通整飭未便遽議裁撤其歸練餉局發餉者馬步二十二營二隊原撥銀一百十三萬兩共銀約八十萬兩撥歸常備軍餉需惟此項裁節之款必須各省協餉一律解足始可照數勻撥倘稍有短欠卽難挹注軍食攸關不得不另行請款以資接濟至現在各營容臣隨時體察地方情形再行陸續裁汰妥籌辦理下所司知之○甲寅以徐邦傑爲淮陽鎮總兵○崇善奏查案准部咨新定償款福建省每歲攤解銀八十萬兩並飭試辦各捐如期匯解等因當於光緒二十七年十二月間經前督臣許應騷奏明設立濟用局遵照戶部奏咨通行勸辦隨糧房間錢戶等捐以濟要需卽經體察民力商情議定隨糧一項每地丁銀一錢糧米一斗各收捐錢四十文卽於納糧票內加蓋戳記註明收錢若干加火耗平餘等字樣並不另給捐單以杜需索又房間捐一項凡城鄉市鎮鋪屋及省城寓所核計全年租價收取十分之一由業戶認捐由租戶於應交房租內按數扣繳發給地方官印票爲據其餘民居房屋概不收取又鋪戶捐一項係御史瑞璠奏經戶部議行核其辦法視鋪戶成本多寡貿易盛衰酌定

捐數惟是坐賈捐輸當飭各屬勸諭貿易鋪戶各行誠實董事自行認捐以值百抽三爲則間因商力拮据亦應酌量減收不加抑勒土產紙木魚酒分別認捐亦皆隸於坐賈其餘米穀薪蔬手藝小販量子免捐以恤民艱至推廣膏捐隱寓以徵爲禁現雖舉辦收數無多且新案償欸八十萬加以號商匯費辦捐經費共需銀八十四萬餘俱應隨正開支綜計光緒二十八年分徵收各捐銀四十八萬餘兩不敷三十萬兩有奇雖將閩海關藥釐暨司道庫欸騰挪濟急而各該欸皆關解放京餉兵餉要需現尙無從籌補爲數既鉅爲日孔長深慮難以爲繼惟望各省常洋各關增收關稅結定總數以後核准減攤償欸三四成或可勉期無誤據福建濟用局司道造冊詳請奏咨前來奴才覆核無異下部知之○乙卯恩壽奏蘇省留防太湖水師巡警七營分設長龍舢板原因巡緝盜匪駐護局卡之用第查舢板船身寬大在於洪流大澤之中運掉行駛較靈於緝捕自能得力若於河流汊港水面狹窄處所實不及飛划之迅捷靈便邇來鹽梟充斥該梟所駕半是小船出沒無常來去飄忽水師長龍舢板一遇匪船駛入汊港因船隻笨拙追捕不及往往致匪遠颺不徒勞而無功亦殊有失軍勢伏查前升任撫臣鹿傳霖曾議添練飛划右營當經奏奉諭旨允准在案嗣以餉項無從籌備事卽中止方今庫欸支絀異常既不克多添營勇而梟匪日漸踴張何可任其鼠竄亟宜於原有巡防水師變通盡利使大小船隻相輔而行互爲維繫藉

收因地制宜因時利導之效奴才詳加考察擬將留防巡警中營改用飛划即名爲飛划右營所有該營內長龍一號仍留爲管帶座船毋庸更改其原有舢板二十三號悉數裁撤改作飛划三十六號舢板八號應配勇數悉照飛划右營章程核明訂定以歸一律約計以中營之餉抵制每月尙不敷銀五百三十兩零擬即在軍需項下動支其造船經費即將舊有之船變價作抵如有不敷另行設法籌補務期樽節下部知之○丁巳諭岑春煊電奏廣東南澳鎮總兵潘瀛縱勇擾民鈔署柳慶鎮記名總兵唐生玉屢次失利且多騷擾干總潘繼周句通土匪無惡不作等語潘瀛唐生玉均著革職發往軍臺効力贖罪潘繼周著即在軍前正法以肅軍律○以薩鎮冰爲廣東南澳鎮總兵○岑春煊電致外務部廣西東蘭州於本年閏五月初一日被匪窺陷即經調署右江鎮總兵黃忠立率營往援隨即據報於初九日將東蘭州收復乞代奏 上諭岑春煊電奏悉東蘭州現已克復辦理尙爲迅速黃忠立及出力人員均著查明保獎○馬亮奏伊犁自承平後士風鄙陋師道寢微滿營辦事人員通曉滿漢蒙回文義者固不乏人然兼通俄國語言文字熟習交涉事務者究難其選現設義學所教子弟亦徒粗知滿漢文義未能會通中外文學若不開通風氣培養才能誠恐繼起無人邊遠旗僕近接俄鄰平時既未備通才臨事更何資肆應上年索倫營領隊大臣志銳於會辦司牙牧時曾與俄參議官潘特索福商擬派生出洋肄業雖據覆文

照辦旋因前任將軍長庚交卸尚未奏請舉行奴才到任後察度諮詢愈以肄業洋學開設學堂事可並行勢難再緩當飭滿漢營務處妥議舉辦茲據酌擬章程呈覆前來奴才查核所擬十條尙能仰體欽定蒙學堂章程意旨並於因地因時制宜辦法可以次第推行所議學生出洋擬於距伊犁一千八百里之阿拉穆圖地方俄國學堂肄業取其就近易於詢察學無上進者隨時調回另派不致糜欸曠時其洋學以十人更番往返以三年爲卒業本地學堂挑選滿蒙子弟四十人入堂肄業定以四年爲期按班挑選除學堂房屋由滿蒙各營自行捐建外初辦之年購買書籍製辦器具出洋川資約估需銀二千數百兩額支束修膏火獎賞等項經費無聞之年約估需銀七千五百餘兩奴才詳加酌核所定各欸亦屬力從撙節惟現值庫欸支絀請欸爲難就地設籌惟有牧廠孳生羊隻變價一欸尙可動用以之開支此項經費尙屬有盈無絀如蒙 旨允准擬俟奉 旨後卽於滿蒙官員及投効人役內擇其品學兼優者充各項教習並請 旨卽派索倫領隊大臣志銳兼充總理學堂事務其副理各員卽由滿漢官員內擇其通文敬事者分任其事堂名卽擬額曰養正以示蒙學之義一切章程均照所擬十條核實辦理數年之後於伊犁辦理中外交涉事宜冀可先收實效如將來諸生有志上進願赴京外學堂以及各國游學者准其隨時呈明奏請咨送俾諸生勉加上乘之功得備匡時之選以仰副 朝廷培養人才之意於萬



一得 旨如所請行○戊午諭軍機大臣等本日御史張元奇奏各省學堂宜嚴選師範又奏本科進士入堂肄業可否酌爲變通各摺片著張之洞會同管學大臣妥議具奏○諭軍機大臣等都察院代遞旗女琴格以大員擅殺無辜呈訴冤抑據情代奏一摺著袁世凱派員密查此案確情據實覆奏原摺著鈔給閱看將此諭令知之○諭前據翰林院侍講學士楊捷三御史楊士燮先後奏參河南布政使延祉議加糧賦激成重案當經諭令錫良前往確查茲據查覆該藩司借籌餉爲名輕改舊章辦理操切幾釀大患延祉著開缺另候簡用署懷慶府知府傅標等既據查明各案情節辦理尙無不合均著免其置議○調李岷琛爲湖北布政使以楊士驤爲江西布政使調寶棻爲直隸按察使以岑春煒爲湖北按察使○己未 慈禧端佑康頤昭豫莊誠壽恭欽獻崇熙皇太后 皇上御仁壽殿日本國使臣內田康哉帶領海軍少將瓜生外吉等覲見○以紹昌爲外務部左丞雷補同爲外務部右參議○以瑞良爲河南布政使○諭工部奏正陽門等門城垣樓座情形請飭修葺一摺此項工程著仍派袁世凱陳璧切實勘修俟正陽門修竣後所餘之款卽行分別輕重陸續修理○諭前據御史周樹模奏參蘇元春各款當經諭令岑春煒確查茲據查明電奏已革廣西提督蘇元春縱兵殃民缺額扣餉實屬辜恩負國蘇元春著拿交刑部治罪○辛酉兩○壬戌調楊士驤爲直隸布政使周浩爲江西布政使○予考取經濟特科之一等

袁嘉穀等九名二等馮善徵等十八名升敘有差○長順奏拳匪肇禍仇視教民各省幾出一轍而東三省正值邊釁大啟凡地方莠民無不假冒拳匪乘機滋擾吉林雖於初發之際首除奸慝力遏亂萌而各屬之教堂教民被匪焚燬戕害者仍屬不能盡免光緒二十七年法國主教藍祿業到吉林交到天主教堂教民焚燬房間並搶失財物及被戕人數各項清單計被焚房屋五百一十餘間被害男女三十五名財產不列細數該主教聲稱財產賠款爲數過鉅姑以吉林遏亂較早保全教民實多僅索賠款撫恤銀三十四萬五千餘兩以全交誼等語並牽及官紳多名開單送請參辦被害教民亦須獲犯抵償以相要挾奴才等當派寧古塔副都統慶祿吉林分巡道文韞副都統銜花翎協領富蔭等與之開議該主教初則堅執前言牢不可破繼則雖允略減爲數殊微嗣因歷時過久並准外務部咨催奴才等復與覲面辯論一面仍飭該員等反覆開陳悉心議辦曉以修好之義告以籌款之難推宕十數月磋磨幾十次逐漸減讓始允以市錢五十四萬吊作爲全省天主教案賠恤之款以近日銀價核計正與前次索賠銀數僅得一半言明通省教堂教民各案一併包括在內另有業經指控六案俟查明確據再行照例懲辦又與訂明從前陸續備給市錢八萬九千七百吊卽由此款扣除再於合同簽押之日先交十四萬餘吊其餘自二十九年止三十年止分作三次交清以紓財力所擬善後各條疊經奴才等飭向該主教再四酌定



刪繁就簡總期彼此各得其平庶免後患遂於二十八年九月十八日將合同畫押蓋印此吉林全省天主教案賠恤各欸現經議結之情形也先是法主教商議欸項時耶穌教士均已陸續到吉絕口不言賠恤迨天主教賠欸議後據英教士勞且理交出通省施醫院並耶穌教堂教民焚燬拆毀房間失去銀錢及被害人數各項清單計被焚燬房屋共四百零八間被害教民九名遺失錢六萬餘吊寶銀四錠財產不列細數奴才等復派吉林道文韞協領富蔭等與之開議據該教士聲稱此次來議賠欸專爲受教人所損房產等物索賠銀十二萬兩所有殺害教民匪徒寬其既往等語經該員再四磋商四月之久始將賠欸逐漸讓至市錢二十七萬吊以近日銀價核計不及銀九萬兩作爲全省耶穌教案賠恤之欸所有各處教民焚去院屋財物一律包括在內於合同簽押之日先交錢一半其餘一半於次年冬月交清所訂合同八條較爲和平業於二十八年十二月十八日將合同畫押蓋印此續經議結吉林全省耶穌教案賠恤各欸現經議結之情形也以吉省目下情形而論兵燹之後公私竭蹶商民交困實無此財力可以應付然兩教原索之欸爲數甚鉅磋商核減始及此數亦非奴才等初念所及所有先交錢文暫由司局設法挪墊俟籌有的欸再行奏明辦理以便作正開銷下外務部知之○甲子諭軍機大臣等人奏奉天錦縣紳士齊鴻聲交結知縣門丁勾通匪類迭釀重案該縣知縣何厚琦庸懦糊塗受其挾制等語

著增祺玉恆確切查明據實奏參毋稍徇隱原片著鈔給閱看將此諭令知之○乙丑 慈禧端佑康頤

昭豫莊誠壽恭欽獻崇熙皇太后 皇上御仁壽殿義國使臣嘎釐納帶領水師提督彌勒貝六覲見○

丙寅 上詣 大高殿報謝○還頤和園○以蔣雲龍爲浙江處州鎮總兵○命傅迪蘇載振在御前大

臣上行走○諭御前乾清門侍衛各員入則侍班出則警蹕應如何嚴肅整齊豈容任意玩誤嗣後當差

各員著御前大臣認真整飭務當遵照定制一律嚴整如有怠惰情事該大臣卽行據實參奏毋稍瞻徇

○丁卯諭本日據禮親王世鐸等奏請加上 慈禧端佑康頤昭豫莊誠壽恭欽獻崇熙皇太后徽號一

摺朕欽奉 懿旨自來每逢慶典雖有加上徽號之文惟現在時事艱難疆圉未盡綏謐廣西尙在用兵

各省籌款方殷民生困苦深宮宵旰憂勤從無暇逸惓懷民瘼時切疚心豈宜更晉徽稱乖於夙志皇帝

以恪遵 成憲再三跪請亦難俯從但願君臣一德同懷克艱之義實心實政治理蒸蒸黎民乂安卽所

以盡皇帝之孝所有加上徽號典禮著毋庸議欽此朕竭誠跪懇未蒙 慈允 垂訓周詳益微 聖德

朕亦不敢有違用特宣示天下臣民當無不同心欽感也○己巳林紹年奏剿辦周匪各軍屢次獲勝收

復石屏會圍臨城各情形迭經 臣先後奏報並隨時電陳在案續據總統各軍按察使劉春霖電稱我軍

既克西莊扼要穩紮斷城賊犄角之勢復乘勝攻奪附城賊壘周匪屢遭悍黨出城衝突均經各軍擊退

並鎗斃悍目吳汝魁匪衆膽裂退竄入城緊閉四門不敢出戰馬柱楊國銘楊永壽等均相繼由石屏樓至會合各軍兜圍聲威益振臨城孤危樵汲斷絕勢在垂危而匪黨倚恃城垣高峻未易仰攻兼以元江廣西賓州等處先有死黨前往勾結土匪猶復抵死拒守以待援應劉春霖先經飛飭各該地方營團嚴密剿捕仍飭新任臨安建水府縣前往西莊一帶各村寨勸諭安撫羈縻反側預防搖動其普雄官廳等隘暨江外土司各要路派兵層層堵紮以杜內外竄突一面部署各軍以劉樹元督攻東北省防各營屬之以白金柱督攻東南蒙防各營屬之楊國銘楊兆吉等圍攻西門而屬之以馬柱及補用知府王廣虞試用同知劉樹械統歸調度此外謝鳳生魏榮斌王正雅莊德炳楊嘉紳等各率所部往來策應士卒更番迭進匪衆疲不能支脅派丁勇婦孺登陴協守日惟燃礮轟擊並以火藥拋擲延燒近城房屋火光燭天各軍奮不顧身進逼城根爭先肉薄楊國銘楊永壽等冒險直前尤屬銳厲二十七日黎明白金柱督令黃鳳圖馬文星連國相等率衆潛進一鼓緣登卒爲匪黨礮石所阻未能得手二十八九等日劉樹元督飭劉人儉謝有功陳天貴史鶴齡王爾棟等營挑選精銳競前奮躍亦復屢登屢墜各軍憤極攻撲愈猛鎗礮之聲不絕於耳又各開挖地道備辦雲梯誓期迅拔匪衆震懼有縋城竊遁者均爲我軍截獲據供城中悍目疊經陣斃除郭六先已逃匿在外其餘存者無多我軍攻堅過久亦屢有損折兼多觸暑病

歿積骸狼藉劉春霖懸立重賞慷慨激勸士氣百倍初三夜大雨如注我軍乘勢奮起雲梯百道一時並進城中哭聲動天賊亦奪氣王正雅田慶傑楊嘉紳等砍開東門墮偉陳天貴莊德炳等與新任府縣一齊擁入城外各營仍層層圍布以防逃逸該逆周雲祥正率眾突竄旋被生擒並獲悍目鄒營湯學文瞿桂恍尙沁和蕭復興等五人驗明確係正身立予駢誅人心大快臨安府城遂於是夜克復初四日劉春霖整隊入城安輯拊循發款賑卹難民填衢塞巷焚香跪迎懽聲雷動當卽派營分門扼紮並遣兵四出搜剔伏莽以靖餘氛等情旋復疊據元江通海河西等州縣電稱悍目郭六竄伏建水縣屬之老黑山既聞周逆正法率眾潛由觀音山僻徑於初六夜攻撲通海當經署通海縣知縣請補路南州知州彭繼志督率兵團擊退派隊跟蹤追剿該匪奔匿河西縣屬之七寨河復繞出入大河菁石窩鋪等處於十三日經通海河西兵團圍拿並其黨趙摩羊松王玉階等一律擒斬又元江之余松甘曉雲等亦皆燒香插血糾合黨類蠢蠢欲動先後經各該處兵團拿獲究辦隨卽將脅從解散等語臣等伏查周逆借仇洋阻路爲名陰逞其叛逆之志非特愚頑被其煽惑卽紳富亦從而附和甚且助械輸資揭竿一呼所在應響自綽繯拒捕起事未及旬日連陷臨安石屏賊黨不下萬餘人及進窺通海四出勾結如阿迷蠻戛河西江川寧州彌勒廣西元江各處土匪蜂起警報紛傳勢等燎原幾難收拾臣等奏派劉春霖統率各軍節節

進剿隨要扼防至大兵齊集合圍該逆猶敢作困獸之鬬擲城死拒莫倖外援可謂窮兇極惡當其肇亂之始鴟張尤甚非謝鳳生陳天貴等屢捷於中和鋪先聲不振未易挫其兇鋒非各營乘勝連克曲江館驛則險要屬賊負隅益固非劉樹元督營力戰杜賊繞竄則我軍腹背受敵大局幾爲所搖非白金柱由後路掃盪直前諸軍無從聯絡而兵力不厚非楊國銘楊兆吉等由石屏分兵長驅迅擣進克西莊賊巢則無以扼其吭而斷其臂今幸仰仗天威將士用命卒克殲除巨憝收復堅城羽黨亦以次誅夷底定邊疆上紓宸厯不致遠勞鄰援實非意料所及所有出力之按察使劉春霖等懇恩從優獎勵以昭激勸得旨著照所請該部知道○庚午諭軍機大臣等有人奏廣西賭餉貽害地方請飭速行停止並嚴禁番攤花會等語著岑春煊丁體常查明情形卽行禁革○甲戌袁世凱奏直隸新案鹽斤加價前經臣分案奏請援案飭商隨引包繳豫岸每年包繳銀二十四萬兩直岸每年包繳銀四十四萬兩以裨要需旋經戶部議覆直岸加價比照豫岸加價辦法暫按額引八成包繳以歸畫一並將直隸兩岸加價錢文另按市價核實折銀如數完納均卽奏明辦理等因當卽轉行遵照茲據長蘆鹽運使汪瑞高詳稱直岸各商以亂後苦累仍請按照原稟包繳該司以直隸雖分兩岸同隸蘆綱諭飭直隸各省通力合作妥議具覆茲據通綱直隸各商楊成源等稟稱查豫商前按銷引八成每年包繳加價銀二十四萬兩實已

不遺餘力無可增加直商前按銷引三十五萬道核計每年包繳加價銀四十四萬兩亦係勉力籌維豈知今春津市枯竭周轉維艱春運無多生機已絕乃更有出於意料之外者直境自春至夏天時亢旱硝鹽暢旺官引停銷雖春運不能及時而民間不虞淡食其銷滯私多概可想見所有前稟包繳之數非特無力增加更恐不能繳足實緣長蘆各岸暢少滯多官價愈昂私販愈盛銷引愈滯不但虧額之課款無力包賠卽隨引完交之價亦必因之減少彼時卽予參追於事無濟是以各岸鹽價有酌量少加者有一文未加者實因減價敵私出於萬不得已況鹽店買銀於起初時先在錢鋪提用現銀後以賣進鹽價陸續歸補而錢鋪遂得居奇擡價又兼虧平耗色匯費川資皆須核入錢盤之內比較市價所增甚多且領引時預將加價墊交及鹽包全數銷竣收回民價少則數月多則一二年壓本賠息爲數甚鉅若一文不加及酌量少加各引岸全歸商人包繳虧折更不待言此加價難以錢盤核計之實在情形也惟此項加價專爲償款而設關係重要不得不統計兼籌以期稍裨時艱擬請直豫兩岸商人通力合作無論銷引暢滯錢盤大小每年統共包繳銀七十萬兩均於領引時先按引交銀一兩二錢存儲運庫俟封關時如有不敷再由直隸衆商按領引數目均攤照數交足仍每年提出銀二十四萬兩撥歸豫省其餘銀六十四萬兩專備直省之用豫鹽加價既在運署隨引包繳豫省抽收應請停止以免重複而復舊章等情該



司查此項加價出自民間買價之中誠如部議原應由官經徵按斤核錢以杜取巧然必所賣之鹽實能一律加價計斤核算分毫無缺方能照此辦理直豫兩岸向多硝私官運極滯非他省情形可比各商欲保引岸不得不虧本減價以冀相敵故歷來加價名爲加之於民實則豫岸可加之處不過十之六七直岸可加之處不過十之二三且皆酌量加增從未如數加足其短收之數向係由商認繳久成攤款從前加價一文每引交銀三錢加價二文每引交銀六錢均按實銷引數完交未按額引包繳雖光緒二十三年豫岸加價每引六錢有照額認包之案而直岸加價仍係循舊辦理並未照額包繳均經戶部核准在案誠以兩案情形不同未能強歸一律此次加價四文每引包交銀一兩二錢核與歷屆成案相符直岸原額四十六萬九千餘道除永平七屬及天津口岸並懸引外其應加價之引實祇四十二萬二千餘道歷年實銷之數不過二十八萬九千道至多亦不過三十一萬餘道若照成案祇應包繳此數故該綱總等原稟有按三十萬引包繳之請該司因議及額引七成爲數太少合按三十五萬引包繳銀四十二萬餘兩復酌加銀一萬餘兩共包交銀四十四萬兩雖較豫岸包交之數爲少然按每引一兩二錢核計已逾額引八成之數並非不足七成任其虧短取巧豫岸額引十九萬三千餘道除懸引外實應領引十九萬二百餘道按八折核計實應銷行十五萬二千餘道每引包交銀一兩二錢共應包交銀十八萬二千餘

兩前因豫岸尙係完善之區所收加價既較直岸爲多所銷引數亦較直岸爲暢迥與直岸兵災以後元氣大傷者情形有別且二十三年每引包繳六錢本係按額引包繳亦未便先後兩歧當令按照額引十九萬二百餘道包繳價銀二十二萬餘兩復加增銀一萬餘兩共包繳銀二十四萬兩以上兩岸加價較之歷屆成案均屬加增當時該商等本不敢認包此數祇因償欸攸關勉遵辦理茲據稟稱直岸甫遭兵燹繼以旱災官價愈昂私鹽愈盛銷引愈滯力難包賠即使參追無濟於事該司詳加體察均係實在情形請飭直豫兩岸商人通力合作無論銷數暢滯錢盤漲落每年統共包繳銀七十萬兩除提銀二十四萬兩撥作豫岸加價外其餘銀四十六萬兩專備直岸加價之用計較原包之數加銀二萬兩卽照部議計斤加錢折銀合算直岸額引四十二萬二千餘道按實銷七成合引二十九萬五千道每包按五百五十斤應加制錢二千二百文共應加制錢六十四萬九千餘千照河南辦法按一千四百文合銀一兩共應繳銀四十六萬餘兩今包繳銀四十六萬正與此數相符詳請具奏前來臣覆加查核確係實情且較原包之數加銀二萬兩委屬不遺餘力此時商情艱窘遽難再令加增相應仰懇 天恩俯准照擬辦理仍由臣督飭該司隨時察看情形一俟商力復元銷數暢旺賣價可以多收再行酌加以裨償欸得旨如所請行○丁丑山東利津縣寶海莊黃河漫口○戊寅 萬壽聖節 上御仁壽殿受賀停止筵宴○

己卯 上奉

慈禧端佑康頤昭豫莊誠壽恭欽獻崇熙皇太后由頤和園還南海○上詣 大高殿

壽皇殿拈香

秋七月癸未朔時享

太廟

上親詣行禮○上奉

慈禧端佑康頤昭豫莊誠壽恭欽獻崇熙皇太后

幸頤和園駐蹕○甲申柯逢時奏廣西地處邊陲實關南疆全局近年糜爛至此兵久無功殘賊生靈爲

害最酷

臣自蒙

恩命昇之撫綏夙夜圖維不遑寢處竊計現署兩廣督

臣岑春煊規畫宏遠又得提

馮子材親往督師不難尅日蕩平救民水火無俟

臣鯁鯁過慮惟以凡下之質撫此殘破之區智慮難周

財力尤絀不得不先籌辦法上達

慈聰一兼募土兵廣西苗獠雜處民氣強蠻山易藏奸兵多通匪雖

平時地方安謐而數百人劫奪拒捕打單斂錢擄人勒贖之事亦所不免戊戌鬱林之役苟且粗安患氣

日深一日左右江一帶已有匪巢負嵎踞險可以智取難以力爭近則頭目愈多黨羽愈衆潰兵散勇與

匪相合鎗礮快利氣焰愈熾防兵旣不可恃不得不借助客兵惟客兵不通言語不識路徑利於攻戰不

能搜捕巢穴旣靖宜拔根株今擬派熟悉情形員弁先行前往就地招募土兵不拘名數分布郡邑酌給

口糧以爲之備擇正紳爲管帶選牧令爲管束申明紀律激厲士氣兵旣可用匪亦自除若明之王守仁

巡撫南贛時南中盜賊蜂起朝議發廣東湖廣兵合剿守仁上疏止之其計平廣西斷籐峽獠賊以羸弱